



*Iesus est mené de Caïphe à Pilate, devant lequel il est faussement accusé  
d'auoir subuertý le peuple.*



R apres que Iesus eut esté molesté toute la nuit par les satelites des Sacrificateurs, luy courans la face d'un voile, luy baillans des soufflets & coups de poing, luy disans, Christ, deuine qui t'a frappé ? le matin vint, & derechef ils tinrent conseil pour le faire mourir, l'interrogeans s'il estoit fils de Dieu ; & il leur dit, Vous dites bien, ie le suis ; & ils dirent, Quel besoin est-il de témoignage ? car nous l'auons nous-mesmes oüy de sa bouche. Adonc le menerent de Caïphe au Pretoire de Pilate, où ils ne voulurent point entrer, de peur d'estre souillez, & qu'ils peussent manger la Pasques. Pilate donc estant forty hors du Pretoire, leur dit, Quelle accusation apportez-vous contre cét homme-cy ? Ils luy dirent, S'il n'estoit mal-faicteur, nous ne te l'eussions point liuré. Parquoy Pilate leur dit, Prenez-le donc, & le jugez selon vostre Loy. Lors les Iuifs luy dirent, Il ne nous est pas licite de mettre aucun à mort ; & se prindrent à l'accuser, disans : Nous auons trouué cetuy-cy subuertissant le peuple, & deffendant de donner le tribut à Cesar, & se disant estre le Christ & Roy. Pilate donc l'interrogea sur ces accusations, auquel Iesus répondit, Que son Royaume n'estoit point de ce monde.